

ԱԳԱՐԱԿԻ ՄԻԱՆԱՎ ԲԱԶԻԼԻԿԱՆ

ԱՆՈՒՇ ՏԵՐ-ՄԻՆԱՍՅԱՆ

Հայաստանի միանավ բազիլիկոսները վաղ միջնադարի եկեղեցական ճարտարապետության ամենատարածված, բայց համեմատաբար քիչ ուսումնասիրված հիմնական և պրոբլեմատիկ տիպերից են։ Այդ հուշարձանները, որոնք քրիստոնեություն ընդունելուց հետո առաջին պաշտամունքային կառուցվածքներից են, Հայաստանի տարածքում շատ հարուստ են ներկայացված։ Նման հուշարձաններով հարուստ է մասնավորապես Աշտարակի շրջանը, որը մերում էր պատմական Արագածոտն գավառի մեջ։ Աշտարակի շրջանում գտնվող վաղ միջնադարյան միանավ բազիլիկաների թվում կարելի է նշել Փարպիի Պիրանավորը (V դ.), «Բաղալի ժամ» կոչվող եկեղեցին Ոսկեվազ գյուղում (IV—V դդ.), Հովհաննավանքի միանավ եկեղեցին (IV—V դդ.), Եղվարդ, Ավան և ուրիշ գյուղերի եկեղեցիները։ Սրանք բոլորն էլ ունեն հատակագծերի (որոնք, իհարկե, տարբերվում են մանրամասներում), հորինվածքի, դարաշրջանին բնորոշ ոճական հատկանիշների և շատ այլ ընդհանրություններ։

Այդ տիպի հուշարձաններից է Աշտարակի շրջանի Ագարակ գյուղի «Աստվածածին եկեղեցին», որն իր դարաշրջանի նույնատիպ այլ հուշարձաններին հատուկ բազմաթիվ բնորոշ գծերից բացի, ունի հատակագծային և ծավալատարածական լուծման մեծ ինքնատիպություն։ Գյուղի կենտրոնում գտնվող այս հուշարձանը մեծ հետաքրքրություն է ներկայացնում, բայց երբեք չի եղել հատուկ ուսումնասիրության առարկա, քանի որ նրա մեծ մասը ոչ միայն թաղված է եղել հողի տակ, այլև խճողված՝ շրջակա բազմաթիվ շինությունների մեջ։ Այն, որ հուշարձանը կարիք ունի մանրակրկիտ մաքրման ու պեղումների, ժամանակին նշել է Թ. Թորամանյանը¹։ Ի դեպ, նա առաջինն է, որ տվել է այս եկեղեցու նկարագրությունը և հրատարակել նրա հատակագիծը, բայց վերը նշված պատճառներով դրանք լրիվ չեն (հետագա պեղումները ի հայտ բերեցին բազմաթիվ շատ կարևոր և որոշիչ մանրամասներ)։

Թ. Թորամանյանի կարծիքով եկեղեցին կառուցվել է XI դ., իսկ գավիթը, արդեն իր ժամանակ համարյա լրիվ քանդված, XIII դ.²։ Նա այս եկեղեցին նկարագրել է իբրև կամարածածկ, ուղղանկյուն հատակագծով և կիսաշրջանաձև արսիդով մի կառույց։ Թ. Թորամանյանի նկարագրած որոշ մանրամասներ հիմա բացակայում են, ինչպես, օրինակ, արսիդի կամարը։


Ագարակի եկեղեցու հատակագիծը սխեմատիկ ձևով ներկայացրել է նաև Պ. Կունենտն³,

¹ Թ. Թորամանյան, Նյութեր հայկական ճարտարապետության պատմության, հ. 2, Երևան, 1948, էջ 226։

² Նույն տեղում։

³ Paolo Cuneo, Le basiliche paleocristiane Armene. „Corsi di cultura sull'arte ravennate e bizantina“, Ravenna, 1973.

Հուշարձանն ունի ուղղանկյուն հատակագիծ, որի մեջ ներգծված է պայտաձև աբսիդ: Աղոթասրահի շափերն են՝ $8,6 \times 4,6$ մ: Թե ինչպիսին է եղել հուշարձանի ծածկը՝ թաղածածկ՝ առանց թաղակիր կամարների, թե՞ ուղղակի փայտյա, դժվար է ասել, քանի որ չունենք ճշգրիտ տվյալներ այդ մասին:



Նկ. 1. Ագարակի Աստվածածին եկեղեցու հատակագիծը և կտրվածքները:

Արևմտյան կողմից եկեղեցուն կից է $4,4$ մ լայնությամբ մի շինություն, որի ճշգրիտ երկարությունը հնարավոր չէ պարզել՝ նրա կիսաքանդ վիճակի պատճառով: Այնուամենայնիվ, այդ շինության մեջ (կոչենք այն նախասրահ) պահպանվել են երեք որմնասյուն, երկուսը պատի հարթությունից որոշակի դուրս եկող, իսկ երրորդը՝ հազիվ նշմարվողը, ծածկվում է ավելի ուշ ավելացված պատով: Որմնասյուների լայնությունը տարբեր է՝ $0,78$, $0,47$ և $0,68$ մ: Ինչպես արդեն նշեցինք, Թ. Թորամանյանի կարծիքով եկեղեցու նախասրահը կառուցվել է XIII դ.: Մեր կարծիքով այն կառուցվել է եկեղեցու հետ միա-

Ժամանակի Իսկ Թ. Թորամանյանը, հավանաբար, նախասրահի թվագրման հարցում հիմք է ընդունել շատ ավելի ուշ ավելացված պատը, որը ժամանակին լրիվ ծածկել է հին պատերը և այժմ պահպանվել է կառույցի միայն հյուսիսային կողմում: Այդ պատի շատ ավելի ուշ ավելացված լինելը, ուրիշ հատկանիշներից բացի, վկայում են քարերի մոտավորապես երկու անգամ փոքր չափերը (այն դեպքում, երբ հին պատի քարերի միջին չափերը $0,9 \times 0,7$ մ են, ավելացված պատի քարերինը՝ $0,45-0,5 \times 0,25-0,3$ մ են):



Նկ. 2. Ագարակի Աստվածածին եկեղեցի, Տեսք հարավից:

Նախասրահում կատարված հետազա վերանորոգումների ապացույց է նաև եկեղեցու արևմտյան պատի մեջ հիմա գոյություն չունեցող թաղի եզրագծով տարված փորվածքի հետքը: Հարավային պատի վրա էլ, հավանաբար, գոյություն է ունեցել հետազայում ավելացված նրան ծածկող պատ, որը չի պահպանվել: Բայց այնուամենայնիվ, նրա գոյությունը կասկած չի հարուցում, որովհետև, նախ՝ թաղի հետքը ցույց է տալիս, որ պատը, որի վրա այն հենվել է, շատ ավելի մոտ է եղել նախասրահի առանցքին և, երկրորդ, ավելացված պատի հյուսիսային մասում կա մի որմնասյուն, որին, անկասկած, համապատասխանել է նույնպիսին հարավային պատի վրա:

Այս ամենը վկայում է եկեղեցու և նախասրահի միաժամանակ կառուցված լինելու մասին, բայց այդ վարկածի օգտին ներկայացվող գլխավոր փաստարկն այն է, որ հուշարձանի հարավային պատի վրա գտնվող իրենց չափերով, քարերի մեծությամբ ու շարվածքով բոլորովին միատեսակ որմնահեցերը եկեղեցու և նախասրահի ընդհանուր հարավային պատի երկայնքով միմյանցից միևնույն հեռավորության վրա են գտնվում ($3,4$ մ), վկայելով

դրանց օրգանական կապը և միաժամանակ կառուցված լինելը: Նախասրահի պատերը եկեղեցուն օրգանապես են կցվում նաև արևմուտքից, քանի որ այդ պատերի միջև չկա կարանի և ոչ մի հետք:

Նախասրահում ավելի ուշ շրջանում պատի ավելացման ամենահամոզիչ փաստն այն է, որ այդ պատը փակում է նախասրահի հյուսիսային կողմի մուտքը, որը շատ լավ է երևում հյուսիսային ճակատի վրա: Մուտքը հետաքրքիր է նրանով, որ իր խորության մեջ պատի վրա երկու կողմից ունի



Նկ. 3. Ազարակի Աստվածածին եկեղեցի: Նախասրահի հյուսիսային պատի մուտքի խորության մեջ գտնվող զարդաքանդակները:

նույնատիպ զարդաքանդակներ՝ շրջանագծի մեջ ներգծված հավասարաթև խաչեր, որոնք շատ բնորոշ են վաղ միջնադարին: Փասաղի հուշարձանի պատվանդանի նման զարդաքանդակը (որի կոմպոզիցիան ավելի բարդ է, բայց հիմքում ունի նույն շրջանագծի մեջ ներգծված հավասարաթև խաչ), Բ. Առաքելյանը թվագրում է IV—V դդ.⁴: Ծիշտ նույնպիսի զարդաքանդակներ կա-
րելի է տեսնել V դ. թվագրվող⁵ Երեբունյքի տաճարի իմպոստների և շքամուտքերի բարավորների, կամ Փասաղի եռանավ բազիլիկայի բարավորի վրա (IV—V դդ.)⁶:


Մուտքի քարերի չափերը, տաշվածքը, գույնը և այլ հատկանիշները խոսում են նրա ամբողջ եկեղեցու հետ միաժամանակ կառուցված լինելու մասին, որ մի անգամ ևս հաստատում է մեր այն ենթադրությունը, թե եկեղեցին ու նախասրահը կառուցվել են միասին՝ վաղ միջնադարում:

⁴ Բ. Առաքելյան, Հայկական պատկերաքանդակները IV—VII դարերում, Երևան, 1949, էջ 43:

⁵ Adriano Alpa go Novello, Ererouk, Milano, 1977, էջ 25:

⁶ Ա. Սահինյան, Փասաղի բազիլիկայի ճարտարապետությունը, Երևան, 1955, էջ 243:

Նախասրահի հատակի մակարդակը 0,53 մ ցածր է եկեղեցու հատակի մակարդակից: Նախասրահից եկեղեցի են տանում երկու աստիճան: Նախասրահից եկեղեցի տանող մուտքն ունի 2,03 մ բարձրություն և 1,02 մ լայնություն: Մուտքի բարավորի մասին Թ. Թորամանյանը գրում է, որ այն միակտոր թափի է և ունի տարբեր չափեր ներսից ու դրսից: Բարավորի մեր ուսումնասիրությունը ցույց տվեց, որ այն բաղկացած է իրար կցված 0,6 և 0,57 մ հաստությամբ երկու քարերից, որոնց չափերն են՝ $1,84 \times 0,9$ մ ներ-



Նկ. 4. Ագարակի Աստվածածին եկեղեցի: Տեսք դեպի եկեղեցու ներսը նախասրահից:

սից և $2,26 \times 0,93$ մ դրսից: Բարավորը ՄԻ-ձև է, այսինքն քարերն ունեն երկու փոքրիկ ելուստներ, որոնք հենվում են պատերի վրա, ստեղծելով մուտքը: Այդ ձևը խոսում է եկեղեցին մոտավորապես IV—V դդ. կառուցված լինելու մասին, քանի որ այդպիսի բարավորները բնորոշ են հենց այդ շրջանին և նույնատիպ բարավորներ առկա են ուրիշ վաղ միջնադարյան բազիլիկաներում, ինչպես, օրինակ, Նղվարդի եռանավ բազիլիկայում (V դ.):

Մուտքից 5,28 մ հեռավորության վրա եկեղեցու հատակը բարձրանում է 0,22 մ բարձրություն ունեցող մի աստիճանով, իսկ մուտքից 7,3 մ հեռավորության վրա դառնում է բեմը, որն ունի 0,84 մ բարձրություն: Բեմի աջ և ձախ կողմերում դառնում են 0,73 մ լայնությամբ երեքական աստիճաններ: Խորանի հյուսիսային կողմում կա մի փոքր խորշ, իսկ հարավային կողմում երևում են համարյա լրիվ քայքայված արձանագրության հետքեր: Թ. Թորամանյանի կարծիքով այդ արձանագրությունը արված է Զաքարի ամիրսպառապարի որդի Շահնշահի ժամանակ, որն ապրել է XIII դ.: Վատ պահպանվածության պատճառով արձանագրությունն անընթեռնելի է, ուստի և նրա բնույթը պարզ չէ: Բայց քանի որ եկեղեցին կառուցված է վաղ միջնադարում, ինքնին պարզ է, որ արձանագրությունը ոչ թե շինարարական է, այլ նվիրատվական, հիշատակային կամ որևէ այլ բնույթի:



Նկ. 5. Ագարակի Աստվածածին եկեղեցի, նկեղեցու խորանի տեսքը:

խորանի արևելյան պատին կա կիսակլոր վերջավորությամբ երկար լուսամուտ, որի բարձրությունն է 2,7 մ, իսկ լայնությունը՝ 0,67 մ: Լուսամուտը շրջապատող քարերն ունեն ավելի փոքր չափեր, քան խորանը կազմող քարերը և, բացի այդ, խախտում են շարվածքի ճշտությունը: Դա կարող է վկայել լուսամուտի ավելի ուշ շրջանում բացված լինելու մասին, թեև լուսամուտն ինքն էլ, իր բոլոր հատկանիշներով, թույլ է տալիս խոսելու նրա հնագույն ծագման մասին. մեծ չափերից բացի՝ այն ուղիղ է կտրվածքում և չի նեղանում

դեպի դուրս, որը բնորոշ է վաղ միջնադարի համար: Լուսամուտի վերևում առկա է քարերի մի շարք՝ երիզված փոքր-ինչ դուրս եկող հարթ գոտիով: Խորանի պատի հյուսիսային ծայրում պահպանվել է մեծ քար, որը հիշեցնում է խորանի կամարը կրող իմպոստը: Այն մի մեծ հարթ քար է, որի վերևի մասում կա հորիզոնական սայիկ՝ զուգակցված կորագծով, և իր ձևով նույնպես համոտառում է եկեղեցու վաղ միջնադարյան ծագումը: Ն. Տոկարսկին գտնում էր, որ ալսպիսի իմպոստները հանդիսանում են այս կամ այն հուշարձանի վաղ միջնադարյան պատկանելիությունը բնորոշող հատկանիշներից մեկը⁷:

Եկեղեցու արևելյան և հարավային ճակատների վրա կան հզոր աշտարակաձև որմնահեցեր, ընդ որում, արևելյան ճակատի վրա՝ անհավասար լայնություններ (2,41 և 1,78 մ): Այդ ճակատները հիշեցնում են ամրոցի ճակատներ: Աշտարակաձև այդ կառուցվածքների դերն այնքան էլ պարզ չէ. գուցե դրանք միայն կոնստրուկտիվ նշանակություն ունեցող որմնահեցեր են, մի բան, որ որոշ կասկած է հարուցում պատերի առանց այդ էլ մեծ լայնության և հզորության սլառառով, կամ գուցե ամրոցային պատերի ամրացումներն են, որոնցով և ստեղծվել է հենց եկեղեցին: Արևմտյան և հյուսիսային ճակատները պակաս հստակ են. արևմտյան ճակատում կիսաքանդ նախասրահի պատերը կորչում են հողում, իսկ հյուսիսային ճակատին կից կառուցված են ուրիշ պատեր, որոնք, թերևս, ավելի ուշ շրջանի հավելում են: Եկեղեցու հարավ-արևելյան անկյան ու արևելյան և հարավային ճակատների որմնահեցերի լայնությունների տարբերությունը թույլ է տալիս ենթադրելու, որ արևելյան ճակատն ունեցել է նույն լուծումը, ինչ որ հարավայինը, մանավանդ, որ արևելյան պատը շարունակվում է դեպի հյուսիս: Դա հաստատում է մեր այն ենթադրությունը, որ եկեղեցին գոյացել է ինչ-որ ուրիշ ավելի խոշոր կառուցվածքի պատերից: Եկեղեցու շուրջը կան մեծ քանակությամբ քարի բեկորներ և ամբողջական քարեր, որոնք, անկասկած, անմիջական կապ ունեն նրա հետ:

Հուշարձանը կառուցված է սրբատաշ կարմրագույն տուֆի մեծ բլոկներից՝ կրաշաղախով: Շարվածքի ձևը նույնպես խոսում է հուշարձանի վաղ միջնադարյան ծագման մասին. մեծածավալ քարե բլոկների զուգահեռ կարգերը գլխավոր կրող տարրն են, իսկ բուտո-բետոնային լիցքը բավականին բարակ է, ինչպես ընդունված էր Հայաստանում՝ վաղ միջնադարում⁸: Դա շատ լավ է երևում եկեղեցու արևմտյան պատի քանդված մասի վրա:

Քարերի չափերը, շարվածքը, պատերի լայնությունն ու հզորությունը, որոնք նույնպես շատ բնորոշ են վաղ միջնադարյան բազիլիկաներին, նախասրահի հյուսիսային պատի մուտքի խորության մեջ գտնվող զարդաքանդակները, իմպոստի ու բարավորի ձևերը և այլ հատկանիշներ թույլ են տալիս եզրակացնելու, որ հուշարձանը վերաբերում է IV—V դդ.: Ընդ որում, հուշարձանի հորինվածքի մեջ շատ բան առ այսօր պարզ չէ, քանի որ հուշարձանը պեղումների խիստ կարիք ունի: Պարզ չէ, թե արդյոք այս եկեղեցին կառուցված է եղել որպես առանձին շինություն, որը հետո ընդգրկվել է ավելի ուշ կառուցված համալիրի մեջ, թե՞ հենց սկզբից կից է եղել այլ շինությունների և հանդիսացել է, ասենք, ամրոցային եկեղեցի (այդ մասին մտածել են տա-

⁷ Н. М. Токарский, Архитектура Армении IV—XIV вв., Ереван, 1961, էջ 172:

⁸ Նույն տեղում:

լիս նախասրահի հյուսիսային պատի մուտքը և դեպի հյուսիս շարունակվող արևելյան պատը, որը քարերի չափերով ու գույնով շատ նման է եկեղեցու պատերին և, ինչպես արդեն վերն ասվեց, մեզ թվում է նույնպիսի լուծում ունեցող, ինչպես և եկեղեցու հարավային պատը⁹։ Բացի այդ, ինչպես գրում է Թ. Թորամանյանը, ժամանակին Ագարակի սեփականատեր բեկը եկեղեցու շրջակայքը ամբողջովին խճողել է տարբեր շինություններով¹⁰։ Այնպես որ, հուշարձանի ավելի լրիվ մաքրումն ու պեղումները մեծ դեր կարող են խաղալ նրա մանրամասների հայտնաբերման գործում։

Հետաքրքիր է եկեղեցու այսպես կոչված նախասրահի հարցը։ Թ. Թորամանյանը գրում է, որ շնայած Հայաստանում ընդունված էր եկեղեցուն կից հատուկ շինություն ունենալ չմկրտված և պաշտամունքից զրկված մարդկանց համար, բայց հին հայկական եկեղեցիներում այդ դերը կատարում էին սյունասրահները (կիսաբաց արտաքին սրահներ), իսկ V—VII դդ.՝ եկեղեցու անկյուններում գտնվող ուղղանկյուն սենյակները, և միայն X դ. հանգես եկան ծածկած շինությունները՝ գավիթները¹⁰։ Կարելի է ենթադրել, իհարկե, որ Ագարակի այդ շինությունը ծածկվել է ավելի ուշ, երբ ավելացվել է պատը, մանավանդ, որ գոյություն ունեցող թաղի հետքը նույնպես այդ ժամանակին է վերաբերում։ Բայց այդ դեպքում ինչպե՞ս բացատրել հիմնական պատին կից որմնասյուների առկայությունը, որմնասյուներ, որոնցից մեկը փակված է ավելացված պատի պահպանված մասով։ Դուցե այս կառուցվածքը եղել է ծածկած շինություն, որը կատարում էր վաղ քրիստոնեական դարաշրջանի նույնանման կառուցվածքների արտաքին սրահների դերը։

Հետաքրքիր է նաև եկեղեցու լուսամուտների հարցը։ Հուշարձանի վրա այժմ պահպանվել է մի լուսամուտ՝ արևելյան պատի վրա։ Բայց, արդյո՞ք, մյուս պատերի վրա ևս գոյություն են ունեցել լուսամուտներ։ Դատելով հյուսիսային և հարավային պատերի պահպանված բարձրությունից, որոնց վրա չկա լուսամուտների ոչ մի հետք, եթե դրանք նույնիսկ եղել են էլ, ապա պետք է որ տեղադրված լինեին շատ բարձր։ Իհարկե, լուսամուտների գոյությունը ոչ մեծ բարձրության դեպքում հնարավոր էր, բայց պահպանված լուսամուտի բարձրությունը թույլ է տալիս ենթադրել, որ մյուսները ևս պետք է որ մոտավորապես նույն բարձրությունն ունենային։ Այդ պատճառով, մեզ թվում է, որ եկեղեցու հյուսիսային և հարավային ճակատները եղել են խուլ և հուշարձանին շատ ինքնատիպ ծավալա-տարածական լուծում են տվել։

Իհարկե, վերը ասվածը բոլորը չէ, ինչ կարելի է ասել այս հետաքրքիր հուշարձանի մասին։ Հետագա պեղումները, անկասկած, կհանգեցնեն նոր մտքերի ու կռահումների և, հնարավոր է, կփոխեն կամ նույնիսկ կփխտեն մեր որոշ ենթադրությունները։ Այդուհանդերձ կարելի է վստահորեն ասել, որ գոյություն ունեցող բոլոր տվյալները պարզորոշ խոսում են այն մասին, որ Ագարակի եկեղեցին վաղ միջնադարի կառույց է և այդ դարաշրջանի Հայաստանի ամենահետաքրքիր և ուշադրության արժանի բազիլիկաներից մեկն է։

9 Թ. Թորամանյան, նշվ. աշխ., հ. 2, էջ 226։

10 Թ. Թորամանյան, նշվ. աշխ., հ. 1, Երևան, 1942, էջ 155։

АГАРАКСКАЯ ОДНОНЕФНАЯ БАЗИЛИКА

АНУШ ТЕР-МИНАСЯН

Резюме

В центре селения Агарак (Аштараковский р-н) находится один из интересных однонефных памятников армянской архитектуры раннего средневековья. Ряд признаков (характерный для этой эпохи способ кладки камней, форма перемычки входа на западной стене базилики, рельефы в толщине входа на северной стене притвора, представляющие вписанный в окружность равнокрылый крест и другие) дает основание датировать этот памятник IV—V вв.

Своеобразное объемно-пространственное решение памятника (ритмический ряд контрфорсов на южном и восточном фасадах, продолжающаяся на север восточная стена, возможно глухие фасады) показывает, что памятник, видимо, был частью более крупного сооружения.

В сегодняшнем своем состоянии памятник еще не дает ответов на многие вопросы, и его раскопки представляются очень важными.